


東萊詩集

九之十二



漢書門			
三	四	九	〇
一	四	〇	〇
六	六	〇	〇
冊	架	函	號

庫文閣內			
漢書			
特四十一類			
三四九〇			
六〇			
函冊架			

內閣文庫			
番號	漢	3490	
冊數	6 (4)		
函號	別	41	4



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



淺草文庫

東萊先生詩集卷第九

呂本中居仁

秋夜行

八月九月啼寒蟹十月北風天
雨霜客游無聊思故鄉書來不來空斷腸
鴻飛何為滿夕陽舉頭攬取明月光
置我堂上六尺牀酌玉杯碧淋浪
喚取姮娥來共嘗人間歡樂壽命長
不須辛苦老桂傍

臘梅

學得漢宮粧偷傳半額黃不將供俗鼻
愈更覺清香

牧牛兒

牧牛兒放牛莫放澗水西澗水流急牛苦飢
放牛只放青草畔牛卧得草苑亦嬾兒
嬾隨牛莫著鞭幾年

力作無荒田雨調風順租稅了是但放牛相對眠

洞庭

嘗聞洞庭湖秋至清皎潔往來八百里長風駕明月
中有仙人居容顏若冰雪我願從之游問渠傳寶訣
脫冠着霞佩長與塵世別

細雨

細雨不成雪北風來解紛冥冥小江樹漠漠暮空雲
誰惜江東第今修地下文西齊千萬里遺恨不堪聞

王陽

王陽作黃金才了車馬費苦身邀聲名未免遺俗累
何如陶淵明蕭散塵世外公田二頃餘覓酒償一醉

高風又寂寞斯文若旒贅白眼看世人此意渠不會

題趙丞瑞蕙苾圖

甘泉殿中芝九莖不與百草同條生當時祥瑞已稠
疊蕙苾亦未來爭衡漢皇不容矍鑠翁此物乃與明
珠同爾來萬物更變化蕙苾寧甘死荒野故遣根苗
霜雪白炯若微月來清夜趙郎好事古亦無俯拾旁
觀盡圖畫畫師不辭粉繪費遇時亦得千金價君不
見古來異瑞與奇祥何曾不致南宮下

即事

清陰庭中槐綠潤牆外草職事苦見妨令人惡懷抱
朋從多飄徙令我獨枯槁高牀書數秩時節豈不好

不能逐爾去但覺歸思浩人情便又習世態雖衰老
閉門了殘詩昔者跡已掃何時北窓風清尊為君倒

寄晁以道

朝辭陘山清莫涉潁水綠往來百里間得此意已足
吾人少如願夫子更絕俗閉門觀易象未用傷局促
使我三日留共此一室獨皎如嶺頭月凜若霜後竹
欲為斯文壽以作學者福洛陽佳少年撫事多慟哭
此其於聖學何異狗尾續寧知草玄翁萬事不掛目
深湛而雅澹亦不在反覆吾祖早聞道晚與夫子熟
相期千載外未得一世伏深山竄鼯鼯晚日度鴻鵠
誰能從公游歲月如轉燭

轎上占二首

城北城南柳絮飛街東街西鷓鴣啼海陵三月與春
別一夜雨成三尺泥

風雨屬連春事休十日九日轉城頭雖無俗物敗人
意可使澄江消客愁

次韻遜叔直閣見寄兼請堯明同和

紛紛塵土計秋豪忽送長江八月濤陶令且為州祭
酒鄧公才可掾功曹但看秋到猶締綰即是花時合
緼袍待得公歸吾已老滿田茶蓼與誰孳

萬字同豪
字韻收

再和兼寄奉符大有叔

血氣侵凌不復豪往來欹倒似乘濤寧知嬾過松中

散亦有詩如謝法曹舊藁只堪供醬說故人相贈有
緋袍兗州賓主同風味惡句煩公更一疇

雨後至城外

日日思歸未就歸只今行露已沾衣江村過雨蓬麻
亂野水連天鸛鶴飛塵務却嫌經意少故人新更得
書稀鹿門縱隱猶多事苦向人前說是非

龐公

卧龍雛鳳不曾閑舉世皆危子獨安應念橋公無特
操晚將情話向曹瞞

衛青

將軍相繼出天山漢主吞胡意未闌本自無心接宿

客故人猶有一任安

雜詩三首

烹葵去王畿剥棗在海角歲序忽已周月亦頻告朔
向來手中扇今此已倦捉尚嫌簿領繁不厭朋友數
塵埃向奔走文字費彫琢途人有前知子乃獨未覺
出門見大路夫子焉不學

結髮在簡編俗事方刺促往來三十年未見可棲宿
微官不能去尚恐遭逼逐歸棲則在念所望一枝足
頻蒙故人悞豈有鄰可卜出門雖無車徑自騎黃鵠
重尋置錐地青燈一盂粥

飢蚊青而化怒目虬兩鬚黃昏與我遇且復少踟蹰

肌膚恣啖齧孰視不可毆中宵盛徒黨意氣若有餘
傷哉陷穿虎有時被囚拘求食至搖尾曾此蚊不如
雲龍困螻蟻此語不可誣

秋日三首

諸卿談笑賞先登我欲從之病不能門閉日長公事
少祇一作疑身是住庵僧

塵滿文書燈暗檠荒城相望那殘更莫言泉龍無佳
處睡正熟時聞雨聲

往來奔走一作馳騁看渠忙疾病低回却未妨喚客不須
嫌酒惡隔牆時喜送橙香

橙二首

西風吹鴈欲斜行小檻寒花却未香將謂諸公頻載
酒枉留橙菊十分黃

不辭玉露著新行漫作人間徹骨香知道輸棊償舊
約故留殘菊一時黃

寄京師親舊

屋頭橙實如李梅庭下葵花深覆盃豆田失雨不稱
意野菊出苗虛見猜故人相望一尊酒問我此住何
時回江山空自污敲扑筆硯况復生塵埃交情自昔
少同調人事只今多好乖欲隨明月覓公處限以白
浪搖長淮舟楫誤逢蛟鱷橫歲月苦遭霜露催側身
西望莫回首堂上書生心已灰

和成士鼓鹿女泉詩

成子東游十日程馳裘顛倒帽歌傾新詩頓數神仙
事病耳忽聞京洛聲去住閑一作經幾塵刹往來
還相望一牛鳴再尋六月山前路分我寒泉數勺清一作

春申君

少年談笑解秦兵便欲連從却未成莫謂江東可長
保莫年無意引朱英

秋日三首

罷馬厭鞭策征一作飢鴻思稻梁終年在泥土永路困

風霜御名勿鞍韉愛直須矰繳防吾衰亦一作則已甚念

爾不能忘

交游大半死吾亦老相侵古木十圍大寒泉百尺深
恨猶能切骨愁或至傷心寄語南飛鴈君無笑苦吟
獄掾酸寒極官曹冗長催真同鶴久住不學鴈輕回
婦女能相笑兒童忍見猜猶怜舊老耆老時有一書來
和成士鼓海安道中見寄

成侯老更嬾處世一虛舟暫脫塵埃夢還尋江海秋
從來仙聖宅不數鳳麟洲有意相隨否因公更一游
送盧澹季然之官京師

車如鷄栖馬如狗勸公莫笑循牆走車如流水馬如
龍不如還家行御風以尻為輪神為馬世人計出車
馬下出門險阻道里遠只今誰是能行者海陵亭劇

俸則薄得公相從亦不惡小吏相欺官長怒我自作
煩公笑樂庾公故是豐年玉道兒更自見不足斷崖
獨立老松栢青天何處飛鴻鵠汴堤六月塵自障請
公登高更南望馬煩車怠早歸來且從夫子濠梁上
獨立一作百丈
何處一作萬里

海陵病中 一作寄劉器
丈五首

病知前路資糧少老覺平生事業非無數青山隔滄

海 一作江與誰同往却同歸

先生高卧了殘冬我亦年來不諱窮夜半打窻人不
會滿天風雨角聲中

客游歷歷都如夢身事悠悠略似僧只麼隨緣作官

去不知從古更誰曾

往來車馬鬧泥塗一室蕭然百事無語默二途俱不

涉 一作本自無
言亦無然不勞辛苦對文殊

以飽 一作諳罷卧嬾呼醫剩讀文書不療飢數有故人

來問疾更煩耆舊與傳詩

次韻李叔友賀堯明登弟叔友丹陽人也本

中得其人之詳於王堯明恨未之識也堯明

擢弟叔友作詩賀之堯明令繼作既喜叔友

能不安許可又嘉堯明進退取捨皆中乎道

也三首

柴桑無復陶元亮谷口虛傳鄭子真二子風流知有

在且留餘味及吾人

澄江雖近不容親亦是人間可喜人枯木巖前有岐
路一杯濁酒自成春

二子深居筆吐虹從來氣節萬夫雄欲知聖主求賢
意不為相如詞賦工

次韻堯明見和因及李蕭遠五詩

小閣才堪置一牀病軀雖在鬢蒼浪隨身行李無長
劍猶勝堆錢與窟郎

交游潦倒漫虛名悞結它生文字盟踏盡塵埃公莫
厭不應因酒愛江清

故人飄散各窮途諸老交情却未踈賴有清詩在書

案時時翻讀伴更初

萬里星河指顧間此中何自著江山精金百鍊終無
用才與佳人照指環

阮公游宦喜東平賀監從來憶四明但得從容飽鹿麕
羈不須辛苦辨肴鯖

西歸舟中懷通泰諸君

一雙一隻路旁埃乍有乍無天際星亂葉入船侵破
衲疾風吹水擁枯萍山林何謝難方駕詩語曹劉可
乞靈酒盃茶甌俱不厭為公醉倒為公醒

寄馬巨濟察院時監泰州酒得官祠歸南京

新春欵南園積雨寒不歇起望海陵城幸未還柱缺

聞公得安還未放車軌折電端倒江海曾次湛明月
東風片帆來乃復為此別田園到荒蕪歲事有曲折
不見南山松高卧擁霜雪鬚髯凜可畏此豈念容悅
願公考其然一向鼻頭說

寄趙十弟

十年流落各西東再見初非舊阿蒙晉邑自思藥孺
子魯儒空望叔孫通宦情潦倒三荒徑世味衰頽一
秃翁石室度筆呵吾豈敢且看鮮健勝龐公

叔度季明學問甚勤而求於余甚重其將必
有所成也因作兩詩寄之

兩章後來秀頭角固蘄然但語強弩末不爭駑馬先

寓言有十九由禮至三千所要在守節未言能與權

世之學者忘近而趨遠忽近而升高虛詞大言行不
適實雖始就學則先言言不必信行不必果達節行
權由仁義行而不知知言必信行必果守節共學行仁
義之為先務也故修其身荒唐繆悠之說施之於事
則顛倒悖亂而卒無所正也

念我少年日結交皆老蒼曹南見顏石角上拜饒汪

顏平仲石子植敢幸江海浸得霑藜藿腸諸郎但勉

力餘事及文章

與李宏子植同過信中飲薜荔亭下夜分乃
散別後奉懷遂成長韻

殘花無言卧風雨小亭寂寞延初暑范侯置酒呼我
來共坐階前洗塵土坐間聞有李與韓文字崢嶸各

奇古起卧逡巡失杯杓笑語瀾翻雜歌舞滿城車馬
鬧侵淫誰解牆陰看樽俎薜荔扶疎出枝葉老氣橫
空君一吐人生此會不可常昔者各在天一方簿書
相急如探湯好風吹我來君旁鶯啼燕乳各自忙明
日酒醒空斷腸

秋日呈顏夷仲

老去身已衰事過意愈嬾斯人未寂寞吾此歸亦晚
踈籬帶落葉秋色忽已滿南窓可炙背喚婦同茗盃
舊讀無新功亦復費編纂凝塵亂朱墨妙句折編簡
往者荷蓀翁實具世外眼不能與之游只有興盡返
曹南二三老夙昔荷推挽平生萬卷書未盡一日欵

微詞絕端非自怪識者罕願聞片言佳庶用收褊短
謝任伯夫人挽詩

幽蘭在深山無人終自芳豈伊桃李顏取媚少年腸
高氏有潛德奕世被輝光自其父祖來低首不肯昂
夫人生既賢豈止秀閨房出身事夫子和鳴更鏘鏘
笙鏞列兩序圭幣羅中堂云何去日遠遂棄陵風翔
伋也奉慈訓將見久必昌瞻彼汝南路松柏泣新霜
凄然馬鬣封千歲終不亡

贈筆工安伋

昔人三年學屠龍技成不試身已窮安生不願泝泝
封嗜好乃與屠龍同使世不磨磨其鋒側出逆曳求

新功及也中立無適從隨語欲用吾能供歛溪孕石
南山松四方萬里時一逢病夫乍閑百念空敗毫破
管塵埃蒙明窓淨几聊從容恨無列宿羅心曾使汝
得見文章公展卷略書吾已慵

寄共城賈秀才

萬里歸來四壁空舊游渾在默然中明年我欲江南
去何處留詩可寄公

題大名官舍

宿昔尚殘暑晚風吹欲無不知留此住更白幾莖鬚

東萊先生詩集卷第九

東萊先生詩集卷第十

呂本中居仁

秋日即事四首

瓦爐香燼欲凝塵小檻黃花更一新絡緯戒寒鳩喚

雨一作喚婦世間那有自由人

鬢髮蒼然雪欲垂問君何苦讀書為旁人不會一作悟

回頭意猶記田光盛壯時

簿書塵土亂蒙茸無復江船萬里風卧聽秋聲滿簷
溜不知牆下有梧桐

何處螳螂欲捕蟬主人初未覺鳴弦稍知東里能堪
事一任神龍鬪涸淵

閏月九日 政和戊戌

疎林渺渺下新霜留得黃花小檻香莫道窮秋少風味一時頓有兩重陽

惡木

惡木不忍伐留我牕戶前人皆笑我拙我獨為汝賢共生天地間誰不願長年如何枝葉內便縱斤斧穿人或甚於斯同被恩愛纏燕昭與漢武所享固已偏樂極未肯休更欲求神仙孰能以此心擴為無盡泉大哉周文王尚結枯齒緣傷生有禁止亦具月令篇好木雖云好不須公愛憐惡木雖云惡莫自生讎冤歲晏霜雪穩夏深雷雨顛扶疎有震落與公常晏然

江上二首

南山稍踈闊病眼不能明月挾清霜下風隨細浪行未蒙青鳥信虛負白鷗盟不見臺城路年年春草生甚欲從此去作煩渠未休風期竹萬箇活業橘千頭漢水覓二老青門尋故侯情知作寒士不解殺袁劉

寄外弟蔡明善

相見還須未白頭只今君是富春秋鶯花與夢飛騰去甲子如川日夜流白酒可澆千卷讀青山欲喚十年愁無因早辨歸耕計更就深公買沃洲

秋夜

鳴鳩喚雨入西樓草樹蟲聲旋作秋明月自如常夜好晚山仍發去年愁久拋詩酒尋思去勝與兒童作

隊遊辜負禪心多少事石城看渡木蘭舟

蛇

山雲樓起風旋磨百毒乘陰出相賀中庭夜夜蛇作
堆草堂病夫愁欲破時須兵子設符呪更遣狸奴旁
坐卧雖非當道白帝子恐是多年老書佐蛟龍變化
未可量草莽連崗足逋播農夫催租正苦辛莫向零
陵作奇貨

謝新酒螯蟹

提壺滿送小槽春尖團未霜亦可人略借畢郎左右
手爲公一洗庾公塵

寄諸子

南國早愈甚西郊雨復休蠅蛆作殘暑蛙黽闐清秋
草暗黃沙盡風吹白日愁祇應有相憶時倚仲宣樓

湘水

湘水一番竹下有千畝陰寧知竹上淚是妾一生心
頃與知止相別於曹州西門外蓋今十四年
矣聞嘗自澶淵過此感歎

昔別是茲土今游還偶然似聞嘗少憇猶自未眞傳
所過有陳迹相逢多少年長塗守病馬何敢更爭先

雙廟

唐四葉孫德下衰久厭坐穩思奔馳外由驕胡內艷
妾揚李氣燄相奪移太宗之業甚整齊尔曹忽來撞

堵之旁人爲之奄弟志也之甚矣渠不疑賊風忽來
吹白陂翠輿走避寧弓追倒立却視千熊罷猛將不
解河北圍睢陽失守東南危城中月餘析骨炊兩公
奮驍死不回鼎鑊在前惟恐遲蜀中消息未可期此
輩未易折筆答念公不量勢力微本自不辱國士知
大厦又非一木支何必感槩如此爲往時開元全盛
時公胡不念鱸魚歸亦不往吊湘江纍死後聲名何
足竒商山老人吾所歸

歸自成園

新春今幾時忽有簷外朶病眼久不明念此歲月頗
橋南數畝園風雨與關鎖主人默敲門荆棘生道左
還家續殘章妙句仍帖妥雖無鑪錘工亦有盤礴羸
歸帆渺江湖宿疾眩風火扶犁伴老農此語當自我
君看鄉閭鬪則有閉戶可名御無學春蚕作蠶自纏裹
與諸舍弟游董村

來往無十里頗能妨晝眠踈籬董村水遠樹洛城煙
酒薄詩牽強身閑病接連荒田點殘雪知在甬山前
見信民舊書有感

蝸涎狼籍閣殘書彷彿黃公舊酒壚試問東山謝安
石不知能似此人無

同叔用宿子之家

老足交親薄江冕爾獨賢文章未遽絕歲月或堪憐

薄酒寧非道寒灰却會禪猶須五湖口風雨夜同船
隄上

落花吹盡不堪憂只見河隄水慢流晚日強穿城北
市春風猶駐驛南樓妻孥轉覺爲身累歲月終難望
汝留萬里長江一尊酒故人何處倚扁舟

游西池歸

偶爲池上游入郭天尚早香塵入晚霧柳色映馳道
我馬亦未疲歸路貪月好還舍了無事百念紛未掃
近店酒可沽重當爲君討

出順天門歸陽翟二首

遲明出都城夾路多柳色行人半歌哭莽不見阡陌
西池已春晚我復道里迫枯田甚渴雨久作龜兆折
屢遭人馬飢更悟坡壠隔微官戀升斗恐負朋友責
初無秦楚遇亦有陳蔡厄沉憂能傷人今汝頭已白
淵明在柴桑意亦憚遠役豈無好事人助子了耕植
還家賦歸來頗自悔平昔向時經由地風雨晦行迹
欣然倚南窻謂此可容膝孰知劉檀輩生有五鼎食
流風未遽遠此士真有力傷哉謝太傅辛苦至折屐

新鄭路中

柳絮飛時與君別南樓把酒看新月月似當年離別
時柳絮隨君何處飛落花寂寂長安路陌上十人九
人去準擬歸鴻寄得書回頭已失秦州樹丈夫薄情

多可念爾獨何心守貧賤勸君以金屈卮贈君以長
短歌城南城北春草多明月如此奈愁何

離新鄭

荒村更柳色節物近清明去國三年恨還家一日程
故人投曉別羸馬傍山行何事逢寒食春來苦要餽

宿潁昌范氏水閣

溪流淺無聲月色初到竹主人中夜歸客子睡已熟
向來湖海興歲事方窘束云何蟋蟀歌更自傷局促
相尋覓舊約見子故未足脩然解衣卧高枕被數幅
賢哉五年別有此一室獨我須日已白子髮良未禿
尚懷平生歡歌呼聲徹屋何須豕腹脹更伴狗尾續

明朝尋故人戲語公一讀

聞南寇已平歡使之甚作詩五十韻

日月開南極山河拱上都聖朝頻決勝賊黨莫狂圖
驛道傳烽燧官軍下舳艫弄兵心已壯喋血氣猶麤
臘月杭州破驩聲歎縣屠迹雖連勁越勢欲動全吳
劔戟排空上芻糧夾路輸予方在衰杖意不保頭顱
豈謂除關傳都非驗漢符坐看前乘沒誰救左輪朱
守將仍安枕鄉豪肯棄軀百川歸巨浸一命仰洪鑪
撫事思同輩低頭失壯夫風雷蟄龍卧名字列仙臚
遇寇來淮口迎家傍海隅未隨霜雪死甘伴甲裳趨
每有妻孥問寧知道里虞荒城補泥土旱水著菰蒲

交友多流寓人煙乍有無相逢可慟哭掩淚只長吁

羽檄邀鋒

一作風

數江船取路迂艱難脫紛擾潤澤到

焦枯婁辱分金送兼容折簡呼同羣見鷺鷥猛獸伏
於菟往往投僧飯時時就客廚苦留春駘蕩勤對色
敷腴不有溝中斷其如屋上烏身猶訪安佚意獨離
囚拘行李催歸疾生涯與舊殊裹糧違戰地舉足值
窮途悞馱韓城僻虛隨潁水紆舊書猶醬詬破屋但
繩樞蔣詡空三徑楊雄更一區生平從學圃老復厭
爲儒愛草騎驢穩看雲借杖扶幾年洪坎廩盡室付
崎嶇觸熱醫頻喚傾囊酒漫酤素冠窮偪仄白髮鬼
耶厥側轉驥繫足往還狼跋胡衆憐東郭困自學北

山愚取別方搖扇成詩欲斷壺踈籬倒未忝驟雨落
楸梧苦語終難好清談却未須家猶近墳墓晚或望
桑榆今日祆氛滌新秋暑氣蘇如聞舊巢覆盡伏逆
臣誅遣卒寬平賈令民內半租文章元典則刑賞舊
規摹桀惡先函首渠魁已獻俘書來問安否尚足尉
馳驅

還韓城三首

乍喜全家脫虛疑疋

一作萬

馬奔乾坤德甚大盜賊爾

猶存稻隴秋仍旱溪流晚自渾素冠兼白髮愁絕更

誰論

白馬一作皓首

老有幽禪着窮知俗事踈漸諳深屋病無復故人書

日月馳驅後江山疾病餘新涼有佳句端為述離居

日月一作歲月

讀易初無說言詩既有功客游千里異心事一尊同
藥裏難休老經函可御窮江淮足知遇耆舊憶徐公

秋日至孟明莊

野色幽花靜有餘好山雖近不同途荒村被雨泥三
日草具留僧飯一盃斷壠入秋頻放水老農垂手怕
催租平生粗識田園興更復何門可曳裾

韓城紀事五首

老耻為儒不學禪還家常欠買山錢成州太守憐衰
病時有書來說太玄是以前守成州

糠豆猶慳不到盤小兒寒至尚衣單雖無事業傳惇
史或有聲名託裨官

穩看飛蟲着網黏爐香欲盡不須添未嫌禿頂如壺
赤何處香醪似蜜甜

病來每有為僧興老去初無涉世心它日三江五湖
口斷雲寒水有知音

老不謀身望子公少年豪氣想元龍倚松菴下香巖
路今日書來第一封

陽翟冬夜

一作冬日書懷

便往一作死吾何敢長閑一作力未能寒爐夜篝火急
雪暗翻燈喚客初無酒敲門尚有僧不嫌空四壁一作

猶餘四壁立 相對倚枯藤

孟明田舍

未嫌衰病出無驢尚喜冬來食有魚
往事高低半枕夢故人南北數行書
茆茨獨倚風霜下粳稻微收鴈鷺餘
欲識淵明只公是爾來吾亦愛吾廬

雪後

謾遣兒童掃雪開却穿籬落看春回
溪山冷淡泥三尺故舊飄零酒一杯
近買芒屨供踏雨更收藜杖與尋梅
玉川老去生涯在時有鄰僧送米來

宿田舍

飢腸不貯酒凍粟自生膚
旅枕三年夢荒村一事無

不愁風折木時有火添爐
尚想崔夫子冬來體更作

簞瓢體崔德符却未勝居郊城

除日

我食已併日子來能隔年
溪山出城路風雪探梅天
納息初聞妙緇經舊有緣
相陪得清坐不敢歎無甕

將遊嵩少題石淙

石淙在嵩山之東三十里
下臨絕壑有流水焉奔騰
縱放適與石會蛟龍之所
畏避風雨之所出入駭目
竒異之觀少有能過此者
矣作石淙詩

南山吐雲柳絮飛北山之外煙草微
南山北山日在

眼問公此去何時歸石淙山水更奇絕水怒決石山
崩摧長空無聲曉色靜忽聽萬壑懸驚雷珊瑚缺折
玉破碎月落倒卷從天回中流險絕不須道笑侮濫
瀕憐離堆平一作半生好事心突兀時於圖畫見彷彿
褰衣度水公莫一作勿畏何須苦避蛟龍窟明朝更作
嵩少遊五更絕頂看日出

登太室絕頂

生平仰嵩丘今日上絕頂蒼天不能高星斗闕光景
風雲乍起伏雷雨半蘇醒下看飛鳥背錯亂松栢影
神龍不深遁偃蹇卧半嶺舊聞飛石闔不受懸瀑梗
大河東北流渺渺黃數頃五更看日出平地湧金餅
誰能啜其華夜氣初未冷諸峯環而立一一皆秀整
中居此丈夫衆象不得騁巍然萬物表獨閱百代永
同來有奇士可得一笑領不用貯微言區區弔箕穎

與崔德符田元邈別後奉寄

處僻猶多事陪公得暫閑直緣怕酒去不爲憶家還
苦語知無策微官直強顏高城更南望林斷有青山

出遊

日日春濃病不知偶游僧寺送春歸長年誤跨將軍
馬漸老空悲游子衣山路有泥知雨過村場無酒驗
人稀今秋定作江東計趁得鱸魚八月肥

董村歸路馬上占暫歸陽翟

水聲高下竹回環薄酒無功不耐寒白塔忽從林外出
出青山常在馬頭看

嘲柱杖

王郎贈我桄榔杖三歲庵中伴我閑只為嬾行常靠
壁不能隨我過嵩山

靠壁一作倚壁

木煎

斷苗取靈根斲石不到土道人掃落葉閉戶手自糞
晴煙溜窻几初夜過風雨老盆酌天醴春甕發膏乳
檐囊到城市餽我一勺許中年血氣敗今我飲此醕
色如饜飴重味有荷心苦京城舊交游難覓亂鼎俎
誰能供此飲遠視鴻鵠舉一洗肝肺塵但嚙公勿吐

有客

燥硯湯水不濡筆濁酒欠錢長

常一作

卧瓶此中定

一作故

自有佳處紙帳蒲團增眼明故人江南江北岸千

一作百

書不如一見面人生歡會不可常畫梁已送西

一作雙

飛燕

李文若季敵訪余高安留連累日臨行贈之

十年奔走風塵中學殖不進身愈窮夢斷江南不得
往坐歎歲月如驚鴻君家政當匡廬路時有僧行附
書去每念君家草堂好便欲移家就君住當時氣象
已參差今日情懷況遲暮斯文未喪欲誰託交游十
人九不樂百川東下障狂瀾伯兄巖然如斷山蒼蒼

在上久無意空使妙句留人間兩季只今名籍籍此
方人士所未識未歇中原胡馬塵且喜沙頭風浪息
高安相遇一長吟盛夏苦雨成淫霖顧我無能甘畎
畝如君豈合在山林豫章老矣棟梁在莫厭它時斤
斧尋

木芙蓉

小池南畔木芙蓉雨後霜前著意紅猶勝無言舊桃
李一生開落任東風

東萊先生詩集卷第十

東萊先生詩集卷第十一 呂本中居仁

食筍

窮鄉未寂寥五月富筍茁近山新得雨此物晚亦發
初看數寸出意有千尺拔長條不成鞭乃以美見伐
錦綉罷駢頭玉指已不韞坐令藜藿口如受滌瀆滑
連年江海病未免魚蟹罰甘津到齒頰恐此或未察
居閑快一飽我已久斷殺更莫厭比鄰時時聽羹羹
白鬚

不作韓城住虛為河朔行白鬚鑷更出如為阿誰生

宿劉固寺佛殿下即劉伶墳也

劉伶墳上土佛殿古崔嵬坐久野僧出天寒鴈來

千年醉裏魄一甬死前灰未盡先生意空留數字回
懷衛道中寄京師諸友三首

客舍冷如漿客夢甘若飴初無遠行念況有徂年悲
平生好交遊大半走路歧不如亭前月所到長相隨
何時脫身去共採西山芝有兒當似公尚能傳我詩
直莫如兩王清莫如兩方孫謝豈不美久滯尚書郎
黎子老歸國只今鬚鬢蒼邵子住山雲欲出未肯忙
高子出林壑坐看天際翔
人誰不小康李趙常窘束窮閭覺溫火老未飽饘粥
心長未遽數此事已絕俗爲人死不厭自奉一米足

河堤

平田接長河眼界起突兀今日並堤行麥壠青已出
寒行不知晚但感此節物新霜被西山久厭塵土沒
坐懷故人面於此見髣髴

寄濬州張揆

張卿留客酒如澠我欲從之病不能憶過公家更東
望斷崖高樹雪層層

田家樂

東家西家蠶上簇南村北村麥白熟小兒腰鎌日早
歸大兒去就田間宿斗酒相邀不爲薄鄰翁相對且
斟酌聖主當陽億萬年年歲歲田家樂

梅

獨自不爭春都無一點塵忍將冰雪面所至嬉游人

寄崔德符

江城昔還往耆舊各能文暫別猶相憶雖忙亦見存
好詩能愈疾濁酒不勝渾它日經行地相尋夜叩門

還家

解鞍歇馬倦西游過眼文書且罷休薄酒向人殊有
味長年於世已無求常情未語溝中木俗眼能驚海
上鷗何處雲山不堪隱更誰辛苦訪菟裘

即事

曉菘早韭老不厭夜鯉晨鳧多見踈地僻難尋野僧
飯路長時枉故人車青山出沒塵埃裏白髮栽培疾
病餘更有腐儒窮事業夜窓殘燭一編書

讀易

春溫瘡疥繁衣敝蟣蝨細頽然坐南軒讀易初有味
初看象數殊忽此文彖異紛紛者衆說行各半途滯
大言累千百雜解記一二坐令人分復以小大計
或強出枝葉或自起旒贅孰能言語表能使意獨至
空中本無華眼病因有翳沈思忽有得是則入精義
吾生晚聞道歲月今少憇遺經日在眼似足了一世
臨流濯垢衣尚勿惜餘棄

復往大名三首

復往真無策茲行亦漫游塵埃走劇暑風雨占新秋

便欲還家去其誰爲汝謀尚憐蘇季子虛敝黑貂裘
我老不自得每爲飢所毆漫拋青蒨笠空負白髭鬚
見賊猶堪鬪逢人莫問途寒區足秀句山澤有臞儒
地濕頻經水田荒亦未收斷雲催雨過漲水沒橋流
半世想高卧十年悲遠游藜羹不用挾尚足誑飢喉

開德道中

五更發荒村小憩草市北披衣度積水月落天正黑
豆苗半委地野父厭匍匐我馬則已飢泥土污羈勒
翻思在家時一飯亦假貧小兒不解事笑語頗自得
官走道路此責久未塞速行勿遲留手須擊賊

陽翟道中

不爲傷離別其如漸老何祇應從此去轉覺白鬚多

長葛道中遇周原仲

羸馬衝寒驕不駛積雪殘冰雜泥滓長葛縣中日落
時舉頭忽見周夫子下馬相看兩驚怪各喜南歸此
身在僧房夜語久不眠更摩枵腹償詩債子行四方
尚謀食我亦年來倦行役櫪下驂騮世得知海底珊
瑚人未識長安公卿富貴客誰能日在子思側洛陽
年少未宜輕看子重陳治安策

簡叔易益謙兄弟

秋來歸興復何如李范聲名更羨渠它日買田吾有
策兩家兄弟要隣居

贈益謙兄弟

范郎走微官清固不絕俗家常四壁立腹有萬卷讀
爾來所爲文深若泉萬斛紆餘風過水宛轉蟲注木
諸弟況可人不但好眉目丹穴固出鳳藍田自宜玉
行扛九鼎重頓使一世伏聖朝急用士如子尚窮獨
乃知德在躬不必富潤屋我病拙文詞筆鈍如髮禿
時逢子兄弟未語心已足長空絕纖埃何處著鳧鷖
朝來秋氣清佇看飛鴻鵠

題蘆雁扇

鴈下秋已晚江天風雨微寧爲聚沙立不作旁雲飛
遊西宮有感

種種不如意悠悠無復聽漫尋村路好似得片時醒
水隱城坳白山來樹杪青晚田收穰襖殘日度笊簪
興入山陰道詩如歷下亭荒原子胥廟千載想儀刑
送一書記果公作天寧化士

田家得米輸官倉一粒不得囊中藏天寧化士去如
雨此亦未易能低昂因官乞取民始病况復妄邀檀
越敬縱今不得半錢歸堂中聖僧應自知

京城圍閉之初天氣晴和軍士乘城不以爲
難也因成四韻

賊馬侵城急官軍報捷頻民心皆欲鬪天意已如春
魏闕方佳氣王畿且戰塵不妨來往路經月絕行人

守城士

北風且莫雪一雪三日寒不念守城士歲晚衣裳單
衣單未為苦隔壕聞戰鼓殺賊須長槍防城要強弩
砲來大如席城頭且撐柱豈不知愛身一作君傾心報
明主報主此其時一死吾亦宜未敢望爵賞且一作幸
令無事歸寄語守城士此言君所知

聞軍士求戰甚力作詩勉之

今春賊來時軍士怖而走今冬賊來時決拾一作射擗
兩肘憤然思出鬪不但要死守仰懷吾君仁愈覺戎
虜醜欲以占天心於焉卜長戈暫勞何足道富貴要
力取行看斬賊頭金印大如斗

下朱二月上旬四首

丞相憂宗及編氓恐禍延乾坤正翻覆河洛倍腥羶
報主悲無術傷時祇自憐遙知漢杜稷別有中興年
厄運雖云極群公莫自疑民心空有望天道本無知
野帳留黃屋青城插皂旗燕雲舊耆老寧識漢官儀
羽檄從天下于今久未回如何半年內不見一人來
周室仍遭變宣王且遇災猶存九廟在咫尺得祈哀
主辱臣當死時危命亦輕誰吞豫讓炭肯結仲由纓
灑血瞻行殿傷心望虜營尚留儀衛否早晚復神京

兵亂寓小巷中作

城北殺人聲徹天城南放火夜燒船江湖夢斷不得

往問君此住何因一作緣竄身窮巷米如玉翁尋溼
薪媪爨粥明日開門雪到簷隔牆更聽鄰家哭

圍城中故人多避寇在鄰巷者雪晴往訪問
之坐語既久意亦暫適也

雪泥春既融曉日初破霧出門尋故人來往不數步
共談江南勝閉眼想去路松風被茅屋稻隴立白鷺
行看賊圍解春水即可渡先當上鍾山次第入廬阜
生平泉石念久受塵土汚況今九死餘轉覺處事悞
預懷巖壑裏所至陪杖屨可行君莫辭行李我已具

城中紀事

生平足艱窘可嘆不可言兩遭重城閉再因群盜奔
今茲所值遇我豈不與聞脫身係兒女恐辜明主恩
傍徨不忍去敢計生理存昨者城破日賊燒東郭門
中夜半天赤所憂驚至尊是時雪政作疾風飄大雲
十室九經盜巨家多見焚至今馳道中但行胡馬群
翠華久不返魏闕連妖氛都人向天泣欲語聲復吞
我病未即死爾來春既分剝牀供晨炊兩眼煙已昏
豈無好少年可與共殊勲志士或不恥有身期報君
塞水須塞源伐木須伐根子莫笑短拙荆蠻生伍員

讀易

江北江南公不歸人言公嬾笑公癡閉門端坐讀周
易直過新春圍閉時

無題

胡虜安知鼎重輕禍胎元是漢公卿襄陽耆舊唯龐
老受禪碑中無姓名禍胎一作指蹤

懷京師

北風作霜秋已寒長江浪生船去難客愁不斷若江
水朝思莫思在長安長安外城高十丈此地豈容胡
馬傍親見去年城破時至今鐵馬黃河上小臣位下
才則拙有謀未獻空惆悵漢家宗廟有神靈但語胡
兒莫狂蕩

讀司馬公集解大玄

京城半年圍道路三月病輕舟過江來所向復未定
客房夜涼冷氣體亦粗勝月空窸窣白風入桐葉勁
挑燈讀太玄愛此頃刻音物數極三甲此理本天命
首贊則分行故未及世應古曆漢則亡易實更三聖
哀哉揚子雲上與數子競雖云耗心力固自有捷徑
後來司馬公獨斂衆說盛錙銖判訛謬一宗蒙是正
讀玄則知易此實公所證如何少年子便欲獻譏評
我老未知學讀此知不稱掩卷坐搔首一洗肝肺淨
明朝尋故人此語殊未竟

黃池西阻風

烏雲啣日日不出驟雨飄風吼三日扁舟寸步不得
行坐歎輕鷗如箭疾我行去家秋復冬故園回思春

夢中客愁茫茫若江水生計渺渺隨征鴻三年京城
共憔悴一杯此地難從容長溪卷浪雪花碎遠山橫
空眉黛濃故人別我上江去亦有書來喚同住破屋
數間君有餘太倉五升吾已具嚴霜未放鷹隼擊盤
渦恐致蛟龍怒片帆欲掛任篙師君但徐行莫深懼

景德北窻

雲橫樹陰濃雨漲溪水白故人喚我出已度蒸暑厄
北窻非不佳尚苦眼界窄小樓隱牀後自與塵霧隔
更憐昭亭山相向有佳色君能具鷄黍略不厭須索
我能知子窮子亦能愛客人生要如是一舉乃諷百
我病思遠引未塞交友責便當約諸公歸耕作長策
囊無一錢羸歲晚會有獲

昭亭廣教寺

故人喚我去一作出一作義兩值新晴草暗鼯鼠出山深鷓
鴉鳴齋厨半盂粥草具一杯羹尚肯頻來否門前春
筍生

昨日之熱一首贈趙彥強

昨日之熱未爲熱涼風頗隨團扇發今日之熱不可
言西山火炎塵障天高樓堅坐若燔炙常恐秋到無
寅緣與君相從今幾日欲度一日如長年憶昔京城
值秋雨人家邂逅得細語不愁歸舍少薪米且喜尊
前好賓主去年君自雲中歸隔巷尋君相勞苦是時

強虜一作在城下耳猶厭聽賊管鼓豈知喪亂到江
南同向宣城過殘暑晚來一兩天遂涼便思約君來
對牀牀前適有新酒熟君醉可舞吾能狂醉中談天
亦未妨回船吳中君勿忙

又贈

日日住疊嶂君能同此游黑雲才映日白雨忽穿樓
盜賊何時定溪山且自幽炎蒸不須厭俄頃是新秋

題涇縣水西

江東住已厭又却復一作過江西急雨投涇縣窮秋渡
賞溪稻田猶少水山路已多泥珍重高僧意求詩索

自題

宿秋霜閣後方丈

秋霜閣後山屈蟠一作行人衝泥脚未乾正是水西
佳絕處不辭風雨夜深寒

水西與李彥恢相從余將取旌德趨徽州彥
恢先歸旌德相候彭元任亦自太平縣來相
送遇于三溪驛遂同過旌德道中呈三子三首

水西投宿近秋霜起聽晨鍾厭一作束裝尚惜故人
輕作別亂山深處過重陽

村場路僻多無酒野菊寒深亦未花底事中原歸不
得又扶衰病過天涯

白頭嬾入少年場二老追隨却味長預喜尊前聽清

話夜窓相對一爐香

休寧縣與汪致道諸公別後晚宿黟縣界魚

亭驛二首

竹密如雲不見天好山無數簇溪田祗應黟縣溪山
勝盡在魚亭驛舍前

故人相繼別休寧山路籃輿睡復醒所恨溪山正佳
處不能同我到魚亭

寄宣城故舊

宣城經歲無它事尚喜交游不棄遺疊嶂樓頭納涼
處宛陵堂下探梅時君今尚要一囊粟我去亦無三
徑資歸卧雲山更深處因書煩報故人知

祈門道中四首

去程歸鴈兩悠悠行到荒山儘上頭試問中原何處
是只言東北是宣州

風落千山雨夜鳴時因歸夢識宣城欲知溪路行多
少已過徽州第五程

宣城人物未全衰四士風流世不一作未知別後略無

佳語寄道中才有數篇詩

詹郎逸氣今誰似李令清言又不聞獨立共傳摩詰
後隱居還見伯仁孫

桂林別珂首坐二首

故人相望馬_二風世事波濤滉漾中灘水東邊兩年

住往還才有一珂公
北歸我已辨行纏
又約相從却未然
何處雲山堪著
子亂松回首嶺南天

荅趙祖文陳夢授

嶺海畏深入江湖成遠游
猶懷不活怖少為故人留
苦乏瓊瑤報虛蒙札翰投
因來問消息不必計沉浮

寄趙十一弟

親朋雖近懶追尋
湖嶺歸來病至今
寄語洪州趙從
事忍令無酒過冬深

東萊先生詩集卷第十一

東萊先生詩集卷第十二

呂本中居仁

浮梁道中見小松數寸者極多然皆與蓬蒿
雜出不能即長也余傷之作詩寄范四弟

青松數寸根意出千丈外
如何蓬蒿底此志以未遂
朝為牛羊踐莫受塵土翳
雖云歲寒姿當此亦憔悴
今年雖小出尚與凡草類
會須扶其根與作梁棟計
大厦千萬間匠石所睥睨
世或未盡知御名勿傷汝志

自祈門至進賢路中懷舊二絕

雨歇路踰滑山空鳥不飛
却思無事日騎馬踏泥歸
汴水夾榆柳今留胡馬蹤
如何進賢路只是見青松
離洪州渡西江至翠微寺紫清宮

平明渡西江，正山正崔嵬。中流欲浪作，細雨隨風回。
促櫂赴前浦，頗爲風雨催。寒沙引細路，人家山半隈。
密雲蔭脩竹，久旱無莓苔。晚入翠微寺，諸峯環抱來。
其西洪崖居，百代所仰懷。何年蛟龍怒，更擊深山開。
縣瀑瀉洪井，噴噫藏風雷。客行少休息，暫此得徘徊。
城中二三老，咫尺不得陪。豈無陵風翰，邀致山中臺。
澗水清且寒，可以當餘杯。獨來不敢久，恐爲神物猜。

宿翠微寺

西山今夜雨，不爲故人留。泥滑淹行李，風聲欲送一作
晚秋。中原且多事，吾黨敢無憂。明日經由地，江南更

幾州

發翠微寺

古殿突兀風，有聲粥魚欲。打鷄三鳴披衣起，坐問行
李。僕夫屢報天陰晴，昨日路長頻雨阻。今日東風得
無苦，杉松連山寒欲動。橘柚隔籬香半吐，却憶京城
無事時。人家打酒夜深歸，醉裏不知妻子罵。醒後肯
顧兒啼飢，如今流落長江上。所至盜賊猶旌旗，已憐
異縣風俗僻。况復中原消息稀。

送宋仲安往虔州

已流之水不可以復回，已往之日不可以復來。唯有
野外籬邊之黃菊，年年歲歲見花開。君如此菊不我
厭，處處相逢同酒杯。三年喪亂那可說，君頭已白我

齒缺高才抑塞久未用坐守松檜凌霜雪君今又作
章貢游我猶少忍住筠州破屋不憂遭鬼瞰端坐或
恐貽一作神羞求田問舍古所歎敢有遠去惟身謀
為約嶺南三數子明年乘興欲一作却東流

與仲安別後奉寄

出門送君時一步再徘徊雖云非遠別念與始謀乖
欲求連牆居故作千里來君今不我待欲跨洪溝回
我獨滯一方後會良未諧冬初風浪息蛟龍深蟄雷
其如中原盜所至尚揚埃子行莫夷猶恐致狼虎猜
胡人更遠適畏死投煙霾皇天久助順似不及吾儕
獨以智力免寧有此理哉因書寄苦語亦以謝不才
新春好天色指望妖氛開即當候歸艤取酒尋罇罌
欣然得一笑便足襍千災豫章百里遠可以慰客懷
須君起我病同上徐孺臺

題筠州僧房

客來無語坐禪房共賞西窓一榻涼山路雨餘新筍
出江城春晚雜花香厨煙已逐鍾聲遠樹色初隨塔
影長敢道閑居便安穩今年更欲下湖湘

離筠州

舊日閑居日無惊已倦游如今避地走不復為山留
淮甸初經夏江西復度秋今朝小亭望東北是筠州
題園悟與惇兄法語

杲公昔踏胡馬塵城中草木凍不春胡兒却立不敢
問其誰從之惇上人袖手歸來兩無語如今且向江
南住雲居老人費精神送向高安灘頭去

建城道中

建城南路入袁州怪石縱橫水亂流盡日衣冠在圖
畫百年心跡付林丘中原未作重歸計胡馬能令此
地憂浪跡江湖亦吾分運籌帷幄有留侯

行至醴陵寄故人

淺溪沙磧寒月白樹影踈我行天一角所至尚躊躇
偶逢勝絕地不異嵩穎居臨流遂忘歸默坐數游魚
寧知胡馬開江縣已丘墟故人亦未來一旬三寄書

不必問溪深但當膏子車新霜隨北風慘慘度重湖
相尋近五嶺御名勿厭長途

將至南嶽先寄演公禪師善公華嚴

胡馬揚塵烽燧作我行乃在天一角江西趺足過湖
南本赴郴陽故人約中途群盜又蜂起所至往往爲
囊橐遲回改路心自笑隱忍畏事人所薄不因此去
渡湘水更欲何時到南嶽山中況有二老人萬里同
來且安樂遙瞻見我應大笑白鬚黑面都如昨平生
故舊幾人在不早從公老丘壑自經喪亂可過從每
一思之懷抱惡請公更說因地初一解人間因慧縛

避寇南行

何處田園不是家，儘扶衰病過天涯。山村酒熟人人醉，客路春濃處處花。敢道嶺南無賊馬，側聞江左尚胡沙。囊空甑倒君休笑，亦有新詩伴齒牙。

貞女峽

欲上貞女峽，江險未敢行。豈是畏江險，愧此貞女名。時經喪亂後，世不聞堅貞。烈士久喪節，丈夫多敗盟。寧聞閨房秀，感義不偷生。窮荒禮法在，尚此留佳聲。時事有通塞，江流無濁清。欲行勿憚險，爲君先濯纓。

山水圖

君家茅屋低蓬蒿，客來頗厭蛙蚓號。何得有此山，突兀氣壓太華陵。高高坐，遙澗受懸瀑，似聽跬步鳴。秋濤差牙老樹半枯死，上倚絕壁緣飛猿。我行日畏盜賊逼，敢厭瘴癘同腥臊。偶逢坐穩懶歸去，豁達眼界無纖毫。嶺南山水固多異，恨無中州清淑氣。對君圖障心，恍然便如一作太華嵩高前。君但對此能高眠，當有好句令君傳。

連州陽山歸路三絕

蒼黃避地出連州，邃谷深巖懶轉頭。歸路始知山水好，少留村驛當閑游。

稍離煙瘴近湘潭，疾病衰頹已不堪。兒女不知來避地，強言風物勝江南。

嶺外從來不識春，青梅年後已嘗新。深山忽有殘花

在知與清明符此人

陽山道中遇大風雨暴寒有感

嶺南二月春已盡
百花委棄隨風吹
山前山後綠陰滿
已過中原初夏時
不知何氣忽乖沴
一作風雨夜
作雷乘之鞭笞宇宙蔽日月
萬象倒錯藏光輝
巖傾澗絕水府現
捕搏虎豹擒蛟螭
百圍老樹不須說
忍凍欲壓摧其枝
崢嶸屋瓦走飛雹
如戰初合麾旌旗
我行避地更值此
閉目但聽兒啼飢
僕夫噤死者數輩
牛馬懼不存毛皮
長途三日斷還往
況有鳥雀凌雲飛
只今胡塵暗江路
盜賊往往乘餘威
良民雖在困須索
四海萬里皆瘡痍
天公忍不一顧此
反更震動窮荒
為此方亦是神所主
我欲告訴心先疑
明朝風定寒亦解
收召魂魄尋歸期
淵自可薦筐筥
試出苦語令神知

答朱成伯見贈四首

三年轉東南
足跡不得息
新霜未壓瘴
已畏賊馬迫
一作蒼黃度嶺去
山路楓葉赤
慨然念平生
謬自有欣戚
交游半鬼錄
在者費相憶
朱卿早聞道
一見如舊識
新詩入要妙
如射已破的
我行囊貯空
所至但四壁
豈如投異縣
忽枉和氏璧
斯文得未喪
豈不繫人力
出門仰高山
此道如矢直
我適蒼梧野
君來洞庭岸
相逢迫一作盜賊一笑未

得款欣然望眉宇於我意自滿天寒道路長歲晚日
晷短僧房肯再來晴窓自妍暖

入林恐不遠入山恐不深城市有深遠不必在山林
隋珠不自寶豈在須淵沈斷絃得遺譜千載有知音
昔在中朝時每從賢俊游酒酣握手歎預懷今日憂
兩經嶺嶠春三度江湖秋朱卿抱竒節好語忽見收
我無濟世策君有活國謀相尋不相笑夜光猶暗投
道喪師友絕寧有民不偷風波極浩渺欲濟能無舟
連州行衙水閣望溪西諸山

嶠南氣常昏終日如霧隔我來已經時初不辨山色
紛紛擊犯眼默默悸動魄今晨忽晴快如語見肝膈

蒼峯插天青野水恣意白深窺木杪靜細數鳥道窄

天心豈無意直欲尉北客才經盜賊擾更脫瘡癘厄
湖湘雖未定勢已初夏迫頗聞胡虜遠不復更追索
我歸當何時俗事累千百便擬衡山前今年飽新麥
憂慮則未已四海方偪仄群公獻納際或肯任此責
先當肅區夏次用及蠻貊豈容胡虜暴歲必有大獲
天雖未悔禍世豈無良策生一作人苟未盡狐兔當
有宅

贈歐陽處士

愛君年少便知足今君雖老更一作無欲閉門不出
動經時保此無窮清淨福黃公弟子雜僧徒共守荒

二
郊數椽屋，門前山水各有態。君但踈籬對脩竹，直如
李路耻有聞清似之。推不言祿，坐看世事雲變化。一
任兒曹手翻覆，上皇龍飛三十春。臨軒亦嘗思異
人，詔書屢下廣搜索。當時幾人能識真，君時聲名動
天子。高卧不起空逡巡，謾收符籙養丹火。一旦四海
生風塵，我來見君斛嶺下。識君無營真靜者，懇懃愛
我莫遽行。尚肯相從結茅舍，時當喪亂足淹留。豺狼
恣橫空山夜，它年有意過匡廬。一作廬山更許淵明入蓮社

嶺外懷宣城舊游

中原未敢說歸期，却憶宣城近別離。疊嶂雨來如畫
裏，敬亭秋入勝花時。每憎多病苦愛風光屢

有詩今日表

那可說鬚鬢 滄海澄摠成絲

余避地踰嶺，寄書且章不賊去則盡失之

感歎有作

賊馬蹤橫未說歸，草間梁上借餘威。布帆此去應無
恙，銀盃從來亦解飛。世事只堪開口笑，主人空有食
言肥。自慙學道工夫少，坐覺文書到眼稀。

過嶺將至江華先寄朱成伯二首

自怪忽忽來往忙，又携兒女過湖湘。敢言此地能安
穩，且道新年離瘴鄉。

嶺下微陰已自寒，早行山路覺衣單。故人見我應驚
笑，疾病衰頹怯據鞍。

端午日北還至斛嶺寄連州諸公

嶺上逢端午隨家更北征
隔村聞賊鬪通夕畏蛇行
厭病初辭瘴衝泥却勝晴
猶憐昌歎酒不與故人傾

山居素飯

豆苗可瀹瓠可羹僧厨早飯蒸
香粳道人得此清淨
供下箸已勝肥羊享平生
為腹不為目偶逢一飽心
自足晚菘早韭舊所知
五鼎百牢未為福

寺居夜起

山深夜無人竹密風露集
長空新過雨尚覺星斗溼
避地走天涯如何免拘繫
朝憂暮慮盡暮恐賊報急
荒城兵火後所至復未葺
古寺半頽垣梟嘯鬼亦泣

感事念平生徘徊近階立

寺居即事三首

瘴癘過庚伏庶幾其少瘳
甘心忍殘暑指日是清秋
汴水他年別郴江此日留
如何理歸夢只見嶺南州
因循過嶺表忽復到湖南
氣力渾非舊情懷老不堪
無錢供痛飲因病廢清談
尚有尋書僻窮搜未免貧
中原是何處敢道幾時回
一夏無書讀經時畏賊來
老松猶偃蹇病鶴久摧頽
莫怪論兵少吾念已灰

贈夏庭別兄弟

披沙簡金勤乃見讀書何止須
百遍如君心期已不凡
况有長兵可鏖戰一寒溼
菘熏病自君但讀書聲

徹屋僧房夜永燈火足更肯襆被來同宿

墨梅

嶺南十月春漸回妍暖先到前村梅問君何處識此
妙一枝冷豔隨霜開長江凜凜欲崩岸乃見好事移
牆隈初疑滲漉入瘴霧更恐寂寞埋煙煤微風不動
暗香遠淡月入戶空徘徊坐看粉黛化羶惡豈但桃
李成輿臺我行萬里厭窮獨疾病未已心先灰對此
不覺三歎息恐是轉側南來異鄉久處少意緒破
壁相對無根芟古來寒士每如此一世埋沒隨蒿萊
通老藏德老不耀肯與世俗相追輪困離音
多見用樣青黃木為
吮墨去顏色况

